

Tirohia te waiata 57, na Taranaki ano hoki, ki era kupu:—

'I nawhea hoki koe ka takitahi

I nga rangi ra e uru wewehi ana.'

Koia i whakaarohia ai nga kupu i taia nei, naku i whakaeke ki te aronga o taua waiata 57. Otira ma Taranaki e titiro mai te mea tika.

⁶Tatara-i-maka:—Kua korerotia i runga ra.

⁷Murupaenga:—He rangatira, he toa no Ngati-Whatua. Hei tuarua mai tenei mona ki Taranaki ko ia i kiia ai he whakatere ope.

⁸Tipa:—He ope kokoti, ka whakamoke i te huarahi, hei patu i te taua haere ware atu. Ki te T.C.286 'tipi.' He karakia te tipi, hei huna kai, huna tangata. Ina hoki te Tipi a Houmea.

⁹Tuhimata:—Kei te ngaro tenei.

151.—HE WAIATA TANGI MO TAWHIO,

Na Tarei.

(Ngati-Awa).

Ko Tarei, e ai ki te korero a Paitini Wi Tapeka o Tuhoe, he wahine na Te Maitaranui, e korerotia ra i te waiata 117. Ko te kaupapa i taia ki raro nei na Paitini i korero ki a Te Peehi (Elsdon Best) a tuhia ai ki te B.3/53. Kei Tuhoe 545 te tungi a Te Motu-o-ruhi mo tana tane mo Te Maitaranui.

E ki ana a Takuta Wirepa he tamahine tonu a Tarei na Te Maitaranui,

Te Maitaranui

|

Tarei—Apanui

|

Hoani Te Ua-terangi

†

Te Hurinui Apanui.

He tungane a Tawhio no Tarei, ko Te Keepa Te Tawhio tana uri.

(Ref.: B. 3/53).

He aha ra te hau e pupuhi mai nei?

He tawaho pea, he homai aroha.

No rau o rangi te hua maharatanga,

Ka roa hoki-mota¹ i te taringa atu,

Kai te marama hea te rangi hokinga mai

I te kino ka hurirua, ka mau kai te kanohi?

No konei a Tawhio² i whakapahau ai.

Ko au anake ra e kai nei i te toko;

Nau i tauwehe ka pamamao atu ana.

Ki tatari ana te whakawa i tau ai haere³ wharara,

E turaki ana mai nga uru rakau o Houtere⁴ i tua.

Hohoro mai koia, kia wawe taku rangi

Te whakatau iho ki te wa hoeroa;

Kai noho i te ao, kai roa te tirohanga.

¹Hoki-mota:—Ki te B.3/53, 'ka roa hoki mo tai te taringa atu.'

²Tawhio:—Te tangata mona te tangi nei.

³Haere wharara:—Kua haere piko, kua koroua.

⁴Houtere:—He ngaherehere kei Opotiki.